

四庫全書

集部

欽定四庫全書

集部

宋詩紀事卷五十五

詳校官監察御史臣李陽樞

侍讀臣孫球覆勘

總校官進士臣繆琪

校對官中書臣牛稔文

謄錄監生臣范廷麟

欽定四庫全書

宋詩紀事卷五十五

錢塘厲鶚撰

郭晞宗

晞宗字宗之仙居人淳熙五年進士仕終瓊管

安撫有漫齋集

白紵詞

遙夜迢迢夜未央井梧月白啼寒蛩感時念往誰不傷
婕妤寵絕辭昭陽手中團扇篋中藏吳姬織紵秋蟬翼

一絲徃復千情積金粟尺量金斗熨為君裁袍為君惜
同盛同衰莫相失

姑蘇臺

春花開秋雁來長風幾度姑蘇臺不見臺上人臺下月
徘徊一樹梧桐生綠苔

以上赤城詩集

楊濟

濟字濟道淳熙五年進士歷著作郎出知果州

有鈍齋集

文獻通考陳氏曰京鍾帥蜀上已出遨濟為樂
語云三月三日豈無水邊麗人一觴一詠亦有
山陰禊事又云良辰美景賞心樂事四者難并
崇山峻嶺修竹茂林羣賢畢至一時傳誦

雲安龍脊灘

洞庭老龍時出沒萬斛舟航皆辟易此龍脊背已鐵石
甓逐時好作人日我呼邦人來踏磧恍然如見河圖出
大巫雞卜占云吉小巫竹枝歌轉激飄石揚沙障江色
塵埃何處不相襲摩挲石刻聊偃息恐有老人來橫笛

四朝詩

章良能

良能字達之麗水人居吳興淳熙五年進士除
著作佐郎寧宗朝官至參知政事升陽周公謹
之外大父也有嘉林集

題玲瓏山

在吳興

短鋤長鑿出萬峰鑿開混沌作玲瓏市朝可是無巖嶮

更向山林巧用工

癸辛雜識

題李伯時飛騎習射圖

禁營貔虎天廐龍枝瘡不奈芻粟豐聞道寶津嘗護駕
前期踴躍矜驍雄紅綃低繫柳枝碧滿滿彎弓斫髮射
偶然穿葉未為奇截下紅綃方破的綵繩長曳綵毬輕
閃爍眩轉如奔星弦頭霹靂起馬腳回看一箭落欖槍
烏紗帽穩春衫薄文韉煥爛青絲絡千步塲深隔九關
畢景馳驅有餘樂李侯應奉隨春官日晏歸穿衛士班
平生抵死憐神駿絕藝那能不細看不學閭公伏池側
倉皇丹粉供宣索他年乘興試追尋妙處祇須憑子墨

十六蹄翻意態真
罄控應節顧眄親
當時騎士盡應爾
尚想元豐兵制新
慨今多事困供億
養兵殆且殫民力
未聞士歌馬騰槽
安得從容觀戲劇

吳禮部詩話李伯時畫飛騎習射圖其手帖云
公麟元豐初點檢南宮試卷畢陪預集英殿門
應奉廷試因得至衛士班見飛騎習射挽毬楊
枝戲人偉馬駿妙天下選時乘輿幸寶津有日
督課勝負窮景不休故頗遂縱觀今追圖大槩
以奉雄堂清玩若氣勢不至差俗則丹青可屏
當蒙照恕也元祐丁卯臘日謹題又云第一斫
髮射最難引弓然多中中者自帛而下平截斷
之射毬鮮中以飛硯故十發三四中為精矣尤
延之楊廷秀樓大防皆有題詩朱文公跋云觀

龍眠飛騎圖及讀延之廷秀大防三君子佳句
因思法雲秀公語尤物移人甚可畏也後又有
古體詩二首其一云奉題太丞丈龍眠騎射圖
下有叔簡字不著姓其一題嘉定庚午四月二
十日章良能考續通鑑長編紹熙元年庚戌秋
八月校書郎王叔簡與禮部郎李嶽著作郎鄧
駟同檢視劉季崇所造新歷叔簡必王叔簡也

王叔簡

叔簡字敬文渠江人淳熙五年進士紹熙中官

校書郎

題李伯時飛騎習射圖

飛毬飲羽柳如截馬氣橫生人更傑不作遊觀御寶津
騎戰還應一當百天家行樂少人知龍眠屬從天上歸
意象慘淡研精微曹霸以來無此奇壯夫披圖雙淚垂
時危那得生致之

吳禮部詩話

曾躍麟

躍麟字子龍南恩州人淳熙五年進士官監察

御史

聞西浦漁歌作

西浦鳴榔下釣磯
歌聲欸乃送斜暉
扣舷互荅驚鷗夢
拍手歡呼看鷺飛
山接素琴仙子過
洲連青草使君歸
海天空闊家長在
一任蘆花雪點衣

廣東通志

甘同叔

同叔字異豐城人
淳熙五年進士官
桂州民曹攝荔浦
縣有節軒集

題昌山聖姥廟

分宜古縣環清溪
重岡複嶺如奔馳
行逢山斷水流處

閔城廟枕山之西我來落日在前嶺摩挲一讀盧肇碑
嗟唐今去亦已久尚餘文字光陸離云昔秦人有天下
鏖戰六國愚黔黎碣山雲氣望不見神物乃降江之螭
雷轟電合助光怪蜿蜒墮地偕羣兒赤鯁王鮪奉鼎俎
追逐甘旨憐姁慈姁先仙去環佩冷安能蟠螭從兒戲
劉累不出浮俗隘况冑委質羸與斯珠宮貝闕世所希
銅環十二白玉扉紉蘭作佩香披披招搖手掉芙蓉旗
哀彈清瑟和宓妃大川擊鼓勞馮夷巨魚踴躍鼉鼉隨

蝦蟹瑣細不得追廟門開闔風颺颺千年萬載龍居之
野巫便伺薦酒卮簫鼓坎坎來宮祠五彩不辨虺與螭
聊以幻化驚群迷嗟我四海久望霓無復空抱明月輝
好施膏澤雨六合豈止但慰袁人思歷階酌水致此辭
退以遺誼傳于詩才慳語類論甚卑龍兮謹勿相訶譏
秦州府志

張釜

釜字君量綱之孫淳熙五年進士累遷端明殿

學士簽書樞密院事

送鶴還齊雲

胎仙誰遣到塵寰
盡日清吟伴我閑
不作冲天支遁想
頗疑攜箭佐卿還
欲追鸞駕煙霞上
宵處雞群伯仲閒
為語齊雲好看取
他年我欲訪緱山

茅山志

閻蒼舒

蒼舒字才元
淳熙中以試吏部尚書使金賀正

旦見金史交聘表

皇宋書錄蒼舒工正書雄健而有楷則尤工扁
榜今陳相堯佐家將相堂大字乃其所書

贈揚州郡帥郭侯

東南形勝惟揚州介江負淮作襟喉有國以來幾百戰
弔古千載空悠悠哀哉荒王與蕩子鈍盡鐵劒崇倡優
迷樓九曲爛如畫珠簾十里半上鉤當年二十四橋月
曾照三十六宮秋平山堂上一長歎但有衰草埋荒丘
歐仙蘇仙不可喚江南江北無風流何人復誦廣陵散
黯然悲恨不可收祇今英主正用武增五萬竈屯貔貅

金城堅築壯營壘綺段細錯良田疇神謨廟筭萬全舉
天時既至湏人謀將軍山西名將種家聲直到青海頭
男兒有死必報國正當為上分此憂勉旃速辦古人事
貂蟬本自出兜鍪

揚州府志

席天祐

天祐樂平人精醫嘗從劉武忠軍采用兵之勢
寓于棊遂成絕藝

淳熙六年冬醉卧僧房作

霜侵古屋月侵窗
撥盡寒灰夜未央
仗劍起看吳楚分

將星今見幾分光

夷堅志

程端蒙

端蒙字正思德興人
朱子門人淳熙七年鄉貢

補太學生對策不合罷歸

絕句

滿城塵土汚人甚
出郭青山入眼多
挈取小舟煙霧裏

此生真箇老漁蓑

饒州府志

黃由

由字子由長洲人淳熙八年進士第一寧宗時
仕至刑部尚書兼直學士院自號盤隱居士

歸來

歸來三閱月無事一闌心刈草尋花徑開池漾竹陰江
邊問明月天際數歸禽幸有高賓至相逢似竹林

吳江縣志

莫若拙

若拙仁和人寓家崇德淳熙八年進士

題資福院平綠軒

結屋地猶淺，鉤簾景盡還。
嵐光烟樹外，野色酒杯閒。
別墅從渠樂，清吟屬我閑。
狎鷗時點白，機事不相關。

至元嘉禾

志

吳柔勝

柔勝字勝之，宣州人。淳熙八年進士，屢遷司農寺丞，出知隨州，除祕閣修撰，主管亳州明道宮。卒，諡正肅。

春晝

深巷寂無人鳥聲花塢春華門長日掩天地一閑身

雅宛

李廷忠

廷忠號橘山於潛人淳熙八年進士

游大滌

清溪路入武陵源雞犬人家隔近村拔地一峯危作柱
棲雲五洞窄開門空庭有客掃松影古徑無人踏蘚痕
我欲白雲巖畔宿月明一夜聽啼猿

洞霄詩集

陳銘

銘字日新玉山人淳熙八年進士

春波漁市

瀕溪有居廛兩岸舟競檣風含水氣腥曉作漁人市魚

羹何處無無錢買金鯉

嘉興府志

于革

革字去非號竹田豐城人淳熙八年進士知房

州

春晚

舍南舍北草萋萋原上行人路欲迷已是春寒仍禁火

棟花風急子規啼

詩人玉屑

詠箋

七八葉蘆秋水裏兩三箇雁夕陽邊筆頭到處渾無礙

埽破寒潭一簇烟

後村千家詩

清都觀

高崖雨洗月華清白恰青藤曳復行老檜不知仙馭遠

屋頭猶帶玉簫聲

南昌府志

俞烈

烈字若晦臨安人淳熙八年進士累除中書舍人嘉定初知鎮江府權吏部侍郎有盤隱詩編

題清虛堂

在臨安淨梵院

天清蠶麥餘綠結桃李實老僧詩銜袖過我語言質懷山意先行如病夢芝朮去山才一舍鞭策不終日堂簷新結束空洞無長物風來舞翠杉土煖榮病橘欲行意

先清舌評驥不及何由解鞍臥夜枕雨蕭瑟談元契參
同酒旨妙真一懷新辜雅趣意嬾健筆亦如罷參僧
野禪縛枯律

咸淳臨安志

孫元卿

元卿樂清人淳熙八年進士仕至國子監丞

與錢孝先游洞霄

元冥相我作山行捲卻重陰放曉晴但見峯巒互局鎖
不知宮闕隱崢嶸雲根洞穴篝燈入井底波瀾撫掌生

喚客入山還送客淙琤猶有石泉聲

洞霄詩集

傳誠

誠字至叔仙游人嘗從朱文公游淳熙八年第
進士調永春尉從侍郎黃艾參政使北張巖開
督府于京口奏辟幕僚著述皆出其手遷太常
博士子彥卿能文以疾卒誠哭之過哀輪對間
卒于殿下

妙庭觀

在富陽縣董雙成故宅

會宴瑤池阿母家九霞光繞翠瓊車坐中一曲山香舞

帽上看看有落花

杭州府志

朱師古

師古蜀人孝宗朝著作郎

句

集英殿下初登第神虎門前便挂冠

建炎以來朝野雜記淳熙辛丑孝宗策士有昌元王昂應祥者既賜第調潼川府司戶參軍自言年踰六十不願出仕上嘉之特賜承務郎致仕蜀人在朝者皆以詩送之著作郎朱師古一

聯最為的切

句昌泰

昌泰蜀人淳熙中浙東提刑

題新繁句氏盤溪

客至輒命酌為言花已開青山長委髻白骨舊生苔不
飲固癡絕能詩宜數來頗憂明日雨紅紫落成堆

成都
丈類

馮仲柔

仲柔山陰人

淳熙壬寅沿檄游大滌洞天

洞府深沈別有天
翬飛樓閣聳晴烟
詩傳玉局驚凡目
丹就金爐記昔年
翠湧千波橫絕壁
風吹萬籟入飛泉
他年待我功成後
卜室青山絕世緣

洞霄詩集

衛涇

涇字清叔號後樂居士崑山人淳熙十一年進士第一除祕書省正字累官參知政事寶慶二年卒追封秦國公諡文節有後樂集

游澱山湖

疎星殘月尚朦朧
閒入烟波滿棹風
始覺舟移楊柳岸
直疑身到水晶宮
烏鴉天際墨千點
白鷺灘頭玉一叢
欸乃數聲回首處
西山渾在有無中

松江府志

徐得之

得之字思叔夢莘弟淳熙十一年進士有靜安
作具徐氏世有史學從子天麟謨西漢會要東
漢會要皆行于世

試雙井茶

先生老作宜州鬼誰與一甌同注湯至今捧著雙井碗

猶帶是翁書傳香

方輿勝覽

句

迺翁畫灰教兒書嬌兒赤髭玉雪膚厥妻曝日補破襦

弊筐何有金十奴

題貧樂圖

鶴林玉露

謝直

直元名希孟避寧宗諱改名直字古民台州黃

巖人伋之孫從陸象山遊淳熙十一年進士歷

太社令嘉興府通判

龐元英談數謝希孟與鄉人陳伯益好相調戲
伯益面狹多髯希孟見寫真挂壁上題云伯益
之面大無兩指髭髯不仁侵擾乎其旁而不已
于是乎伯益之面所餘無幾伯益病之莫能報
希孟後改名直伯益于是以兩句詠其名炊餅
擔頭挑取去白衣鋪上喝將來聞者絕倒

遣懷寄致道

貧者士之常富亦我所欲得常詎可厭逐欲何由足荒
哉化蜨翁微歟監河粟人生命如綫日湏不盈掬俯仰

天地閒何由謝羈束

前賢小集拾遺

俞應符

應符字德瑞錢塘人淳熙十一年進士累官參

知政事

曹公疑冢

生前欺天絕漢統死後欺人設疑冢人生用智死即休
何用餘機到丘壟人言疑冢我不疑我有一法君未知
直須掘盡疑冢七十二必有一家藏君屍

七修類稿

俞應奎

秦皇石

在昌化縣百丈山

祖龍盛氣役神鞭壁立無移只屹然定是先朝陳寶化
陰靈寂寂笑求仙

杭州府志

高似孫

似孫字續古餘姚人文虎子淳熙十一年進士
歷官校書郎守處州有疎寮小集

文獻通考陳直齋云似孫少有俊聲登甲科不
自愛重為館職上韓侂冑生日詩九首皆暗用

錫字為清議所不齒晚知處州尤貪酷其讀書以隱僻為博其作文以怪澀為奇至有甚可笑者就中詩猶可觀也

癸辛雜識高疎寮守括日有籍妓洪渠慧黠過人一日歌真珠簾詞至病酒情懷猶困嬾使之演其聲若病酒而困嬾者疎寮極稱賞之適有客云卿自用卿法高因視洪云吾亦愛吾渠遂與落籍而去以此得嘖言者

入餘杭縣

明發遵西陸驅車月流光佳山迎車來知是古餘杭危樹露如雨平野日未陽支流瀉清源弱羽無高翔人家叢灌下世載山水鄉扣門作午憇白飯羞文魴邂逅有

足歡離合非其常主人不予鄙予留亦徜徉

憩昌化民家

晚程息勞輒白日流西暉水鳥得魚去耘夫荷鋤歸川
原杳芊綿林野雜依霏一來叩竹館相邀入荆扉重巖
吐清溜澄陰布殘馘曰予考此室十世相因依左右桑
果足歲日雞豚肥豐猶未至裕歎亦無能飢予聞良自愜
欲謀北山薇有田可同耕有蠶當共衣車夫猝無情此
志仍重違

荅李才翁

素意杳難尋殘壚屬晚陰
花知西洛事雁叫北人心
客共艱難盡詩隨老大深
金陵書不到消息又沉沉

荅宇文文學

無能應俗苦皇皇詩不驚人筆
事荒天下無山如飯顆
人間有水自滄浪左杯右蟹
一舟足早韭晚菘三畝強
莫謂覺來無可嗜逢人猶自覓花忙

燕文貴山水圖

道山堂上御府畫展卷猶能記老燕十日何由辨水石
千金那可分江天楚湘兩岸風落木海嶽三秋雁度川
大山小山俱好隱江南夢去曲肱眠

答武昌吳廣文

生平不識武昌樓官柳青青好在不庾亮笛吹黃鸝月
簡棲碑駁碧苔秋山橫赤壁含情斷水出瞿塘快意流
何處叫君同一醉並舟秦女擘篴篴

琵琶引

人生聚散難為別，何況恩恩作吳越。
梅梢帶雪下昭陽，明朝便隔關山月。
長城不戰四夷平，臣妾一死鴻毛輕。
回憑漢使報天子，為妾奏此琵琶聲。
長安城中百萬戶，家家競學琵琶譜。
酸聲苦調少人知，食雪天山憶蘇武。
西風吹霜雁飛飛，漢宮月照秋砧衣。
嫖姚已死甲兵老，公主公主何時歸。

銅雀硯歌

曹公夜譙凌雲臺，一言契闊含餘哀。
分香老妓各雲雨，

歌舞不盡薶蒿萊漠漠頽基鄴山下萬里烟塵無一瓦
井幹尊酒自平生烏鵲飛南播遺雅老農墾雨開荒寒
一礫千金苔未乾世人好奇不好近真比周簋仍商盤
老璞渾渾殊質魯得水猶能發妍媸更與人閒作瓌古
月明夜盜西陵土

黃居中瀟湘圖歌

天暝而雨斷兮作蒼梧九疑之高秋風行而川怒兮洩
瀟湘洞庭之奔流樹不知名兮山抱複嶺沙不計程兮

水趨他洲波作止兮蛟舞蛟蟄雲晦明兮猿呼猿愁原
不可作兮蘭亦塵土賈傳歸漢兮鵬其何尤誰呼魚兮
北野有酒誰鼓柺兮南津有舟懷斯人兮杳靄千里目
悵望兮吾其歸休

騎鸞引

夜騎白鶴出琳闕千萬仙官鏘佩玦雲雷帖妥過剛風
左推日九右扶月一息瑤池翠水家阿母迎謁龍驅車
青娥彈絲玉妃酒折盡蟠桃紅玉花九天丈人來問道

太極之前天不老丹霞一氣玉虛宮寶笈金繩容探討
井君沐浴波五色洞房光芒上奔日天上傳呼六丁直
星斗離闌礙鸞翼

以上疎寮小集

由校書郎授徽倅道出金陵投留守吳雲壑

四朝渥遇鬢微絲多少恩榮世少知長樂花深春侍宴
重華香暖夕論詩黃金籬滿無心愛古錦囊歸有字奇
一笑難陪珠履客看臨古帖對梅枝

四朝聞見錄

絕句

曰琯按東臯雜錄作陳天錫

舍南舍北雪猶存
山外斜陽不到門
一夜冷香吹入夢

野梅千樹月明村

全芳脩祖

延祥觀

水明一色抱神州
雨壓輕塵不敢浮
山北山南人喚酒
春前春後客憑樓
射熊館暗花扶屐
下鵲池深柳拂舟
白髮都人能道舊
君王曾奉上皇遊

武林舊事四聖延祥觀西依孤山為林和靖故
居花寒水深氣象幽古三朝臨幸有章太后沉
香四聖像小蓬萊閣瀛嶼堂金沙井六一泉高
疎寮有詩

聚景園

翠華不向苑中來可是年年惜露臺水際春風寒漠漠

官梅卻作野梅開

武林舊事聚景園在清波門外孝宗致養之地
嘉泰間寧宗奉成肅太后亦嘗臨幸其後蕪廢
不修高疎寮詩云云

游九鎖

洞門金畫翠琅玕杏不多花月溜寒借得御書經自讀

松風淨洗石棊盤

洞霄詩集

汪強中郎中送蟹

連日天街候駕歸，且呼酒對早梅飛。
從來吏部高情別，

右手分將老蟹肥。

蟹畧

水西

抱崖一水限僧居，空翠冥濛畫不如。
落日遊人山窈窕，

清風啼鳥竹蕭疎。

詩家鼎鑪

楊嗣勛惠茯苓

道是青神谷元通，白帝厓有松如壯士。
其魄化嬰兒，雲

溼侵鴉觜天寒翦兔絲堯初香摘髓秦後雪凝脂穴動
龍蛇窘山空鳥獸悲惟將千歲力自了一生奇

都下

柳生春思拂京華不管閒人也憶家添盡好香那睡得
月痕如水浸梨花

荅辛幼安

青天不惜日壯士偏知秋自古有奇畫如今空白頭彼
時當再來吾老不可留天推壁月上星入銀河流躔度

若此急人生與之浮終夜自起舞無人共登樓典謨有
陳言河洛非故州黃鶴呼不來誰能理殘裘

以上後村詩話

別雲門

回首雲邊更看松風流王謝舊行蹤不知誰繼諸賢後
夜半來聽六寺鐘

雲門志畧

石橋

一石上負崑崙柱一水西奔牛女渚玉幹猗鱗萬松古
夜夜神光干帝宇石滑苔危水一縷四海長依開闢雨

月落未落半規吐雨足敲泉龍擺舞

蔡山渡

江上人家破竹門潮生水長浸籬根鯿魚一尺枇杷小

放溜船來酒滿樽

以上甬上耆舊集

句

汾獻升雲鼎秦遺蝕雪碑

買硯

沙冷雁一二天長帆有無

曹娥江

白浪不侵魚復陣青苔猶護劍闕銘

送蜀客

旋

作池來分剡曲畧教花處似蘇堤

池西村詩

話

後天差

鶴管烹茶水風夾花吹煮蟹烟

蟹畧

莫若沖

若沖字子謙若拙弟淳熙十一年進士歷官至大理寺丞丐外除知永州不赴卒有語溪集

初春趙仁父寓資福院平綠軒見招

平綠題詩四十年尋幽不厭水雲邊一犁還又耕春後
三白重來醉臘前自笑挂冠林下客獲陪揮麈坐中賢
絕嫌幻色撩人思快睹晴川接遠天

嘉興府志

過崇福院

在青鎮南

首歲融春卜有秋
曉行猶自索貂裘
身閑暫脫微官縛
市隱何如此地幽
一水相望三里近
十年重到片時留
買田擬作終焉計
直是飄然不繫舟

烏青文獻

程卓

卓字從元大昌從子
淳熙十一年進士
歷官同知樞密院事
封新安郡侯
贈特進資政殿大學士
諡正惠有集

遊金焦二山

揚子長江天際來中流有山何壯哉深根盤礴千萬丈
寸土不受雙崔巍金山屹據上流險四面佛屋相環回
來帆去槳別艫舳住僧過客煩追陪排空傑閣揖滄海
海山亂點浮纖埃龍潭列聳石峯巧獨立野鶴慵毳毼
堂前回首指遺像坡翁印老留青煤其人已去詩尚在
唱酬風月相徘徊再三瞻我二山去縹緲又入雲濤堆
焦山一望二十里舟師駕櫓如奔雷行行滉蕩呼吸頃

繫纜确犖登山隈山中僧少竹木古瘦根迸石穿莓苔
幽姿野態隨步出勝處徃徃多樓臺洪厓路轉尋癡鶴
幾年浪打風雨摧遺銘破碎石剝落摩挲細讀心眸開
同行韻遠心未盡飛仙亭上傾尊壘酒酣我為發絕唱
底須方外求蓬萊

金山志畧

雪巖

石門一望路迢迢五老峯高聳碧霄泉挂珠簾當洞口
烟拖練帶束山腰香爐捧出仙人掌輦輅行過織女橋

午夜月明天似水鶴歸松頂聽吹簫

齊雲山志

鞏豐

豐字仲至號栗齋其先鄆州須城人渡江為婺
州武義人少游呂東萊之門淳熙十一年進士
嘗知臨安縣稍遷提轄左藏庫卒有東平集

樂水心墓誌云仲至片詞半牘皆清朗得言外
趣尤工為詩多至三千餘首

曉起甘蔗洲

曉起東風惡晴嵐忽變昏船隨山共走霧與水相吞鉦

鼓遙知寨桑麻畧辨村雨來無準則容易溼柴門

湖嶺下十里是為黯澹灘行者多至此捨舟

急流方了又高岡日永周旋未覺忙壁上字多知店老

嶺邊松茂喜車涼叢叢亂篠承敲石帖帖新荷戀小塘

黯澹惡灘應笑我為虞魚腹犯羊腸

以上瀛奎律髓

翠蛟亭泉出天柱之趾將至洞霄門數折下墜方

盛時如蛟飲澗亭當木石最奇處舊取東坡詩語

名以舞翠客謂不若直名翠蛟為不費荅知宮事

王君思明欣然改之為賦一首

木石相因依妙處在得水遇其相合時澗壑水多止巍
巍天柱峯雙洞空無底怪石抱山迴灌木參天起青蛟
走玉骨元脈貫石髓曲折暫得伸掀舞如掉尾亭成自
何年不陋亦不侈秋深泉久縮亭影照清泚忽遇水飛
流亭入銀濤裏怒蛟捲亭去相距不盈咫尺一落墜兩硤
力竭勢方已終疑入江湖赴海日千里昨夜山雨號梧
竹盡風靡轟雷與石鬪蛟怒幾欲死吾亭方宴然清曉

見窗几因攜一樽來與客相料理
賸擬畫將歸題詩卻畱此

翠微亭

就亭舉杯落葉滿地知宮王君請和韋蘇州落葉滿空山之句

行跡年來到處稀
獨于巖壑有深期
鵝溪道士能相屬
請和空山落木詩

洞霄即事

積蘚青踰一寸痕
山靈守護幾千春
長藤橫繫巖邊木
何日重來挂葛巾

以上洞霄詩集

炊熟日有愴松楸

小樓吹斷玉笙哀春半餘寒去復來五歲不澆墳上土

望鄉心折刺桐開

潯洛風雅

楊安誠

安誠字道父蜀人

白帝廟

并序

白帝廟神舊傳以為公孫氏以予考之非也公孫氏
享國日淺轍迹未嘗至夔獨遣田戎任滿戍江關岑

彭入江關不復為戍守公孫氏無從廟食按鄴道元
水經注瞿塘灘上有神廟甚靈刺史二千石過其下
不敢伐鼓鳴角恐致風雨舟人上水以布裹篙足不
令觸石有聲蓋不謂其神為公孫氏瞿塘天下至險
必有神物司之但有廟偶連白帝城俗遂從而訛爾
余徃來三峽皆託神之庇輒為賦此庶來者有所考
云淳熙十一年正月晦日西蜀楊安誠道父書

蜀江萬壑俱東奔瞿塘喧呌爭一門驚濤駭浪建瓴下

顛崖仆谷相吐吞朋妖窟宅恃幽阻正晝噴薄陰霾昏
靈宮奕奕鎮地險衆瀆稟令川祇尊赤甲後聳黃熊躍
濫潁前峙青猿蹲舳艫銜尾下吳楚約束蛟鰐如雞豚
舊傳鼓角致雨電裏篙不觸撐舟痕綜理脈絡盡西徼
帝假之柄攸司存子陽祚國十年近此地未省東其轅
連江列炬鐵鎖斷戎滿奔北無留屯江關回首盡漢幟
遺黎何自知公孫血食漢代定不爾但有故壘山之樊
子美誤信齊東語感慨勇畧招英魂山川之靈載望秩

僭偽詎可同時論向來名實久清溷薦裸無乃瀆俎膳
請從酈元為考證神理昭昭斯可原

全蜀藝文志

謝牧

題洪陽洞石上

特特攜筇探洞房中藏精氣凜寒芒神仙久視知難學
乞取逍遙物外方

淳熙乙巳冬書

遊名山記

馮端榮

端榮崇安令

題武夷

淳熙丙午

花滿晴烟樹滿雲我來寧是學仙人願將九曲溪頭水

散作年年百里春

武夷詩集

李持國

壽興國守

九月三日

縹緲黃堂擁瑞烟神光照社記當年風雲慶會千齡際
萸菊佳辰六日前蕩節已嘗煩出使輔藩聊復賴于宣
廟堂參贊猶虛位飛詔行看下九天

聖宋名臣獻壽集

劉季裴

季裴字少度福安人孝宗朝終祕閣修撰

壽朱守

匡鼎談經世少雙一時文物動虞庠江湖雖隔金閨籍
衣袖仍聞玉案香墨客幾年陪畫隼板輿平日到護堂
時清身健堪行樂未見荆榛老鳳凰

聖宋名臣獻壽集

李獻可

獻可吉水人

賦宮人午睡

御手指嬋娟青春白晝眠粉勻香汗溼髻壓翠雲偏柳
妒眉間綠桃嫌臉上鮮夢魂何處是知繞帝王邊

吉安府志獻可六歲能詩孝宗召入宮時宮人
正午睡帝命為詩獻可即賦云云帝撫其背曰
何不作我家兒命宮人繡御掌于背以賜歸

王正己

正己四明人珩之子淳熙中官太府卿

題天開圖畫亭

并序

姚伯愿使君築亭真州子城西北隅盡得江山之勝
乞名于四明王正己因誦山谷天開圖畫即江山之
句遂以名亭又為賦此詩

夜來殘暑鑒西風秋聲撼撼先井桐纖雲四卷天開容
一碧萬里磨青銅使君退食新涼逢厭看凝寢香雲濃
領客欲送孤飛鴻城隅高亭溼青紅曠野四望開心胸
前瞻江山勝而雄琉璃波光羣玉峯水墨正爾難為工
天開地闢今古中此景自若無初終天豈為我施新功

我心得之眼相從收入几席無遺蹤錦囊得助防詩窮
李成郭熙將無同撫掌一笑浮金鍾

儀真縣志

宋詩紀事卷五十五

欽定四庫全書

宋詩紀事卷五十六

錢塘厲鶚撰

裘萬頃

萬頃字元量新建人淳熙十四年進士嘉定初
除吏部架閣遷大理司直力丐外任敕差江西
撫幹卒有竹齋詩集

歸興

新築書堂壁未乾馬蹄催我上長安
兒時祗道為官好

老去方知行路難
千里關山千里念
一番風雨一番寒
何如靜坐茅齋下
翠竹蒼松仔細看

娛書堂詩話來元量性恬退不樂仕以薦者召為司直在朝嘗賦歸興云云

閒居

閒居最與性相便
勤即繙書嬾即眠
終日閉門真省事
有時面壁似耽禪
大椿歲籥祈親壽
斷簡生涯聽子傳
待問洪崖覓丹訣
白雲深處引寒泉

以上竹齋詩集

危 稹

稹字逢吉號巽齋又號驪塘撫州臨川人淳熙十四年進士歷屯田郎官出知潮州又知漳州忤部使者請祠歸有巽齋小集

借詩話于應祥弟有不許點抹之約作詩戲之

我有讀書癖每喜以筆界抹黃飾句眼施朱表事派此
手定權衡衆理析畎澮歷歷粲可觀開卷如畫繪知君
篤友于因從借詩話過手有約言不許一筆壞自語落
我耳便覺意生械明朝試靜觀議論頗澎湃讀到會意

處時時欲犯戒將舉手復止火側禁搔疥技癢無所施
悶懷時一噫只可捲還君如此讀不快千駟容可輕君
抱亦不隘昨問雞林人尚有此編賣典衣湏一收吾炎
當痛嘬

經從豐城謁于房州于令侍姬歌舞進酒

蛾眉對酒舞涼伊舞身還逐歌聲齊卷花萬段忽進酒
鬪高蛺蝶飛來低

春日即事

麥風翻隴潑濃綠花露摘枝黏老紅
小立樓頭檢春事
一絲暖日墜青蟲

郭公

郭公郭公聞爾失國春秋時何事到此猶悲啼
郭公前
言亡國故當時祇緣臣子誤百年社稷不得歸
而今家住柘岡西滿目春風都是恨
聲聲說與齊侯知郭亡矣
君勉之

以上巽齋小集

送柴中行出守章貢

力為君王乞得州補天未了石還收人才自係國輕重
吾道亦關公去留殿角纔辭槐影日船頭便轉荻花秋
競誇祖帳東門外誰識眉攢杜甫愁

豫章詩話

宋史本傳嘉定中番禺柴中行去國槇作詩送之
連宰相出知潮州

王居安

居安字資道台州黃巖人淳熙十四年進士累
遷右司諫兼崇政殿說書權工部侍郎帥隆興
府升龍圖閣直學士卒贈少保有方巖集

吳子良序云公之文明白夷暢絕類其胸襟詩尤圓妥曠遠嘗有句云高下水痕元自定後先花信不須催公于出處去就此二語可以占矣僧居簡北礪詩集云方巖王侍郎江西破賊歸小舟迫窄自笑曰今為摺疊侍郎矣

送劉改之

不識劉郎莫便語酒酣耳熱未全疎士當窮困能無嫌我自斟量媿不如橫槊賦詩俱有分輕裘緩帶特其餘
當今四野無塵土宜有奇英在草廬

瀛奎律髓

潘德久有龍眠三馬而失其一俾予賦詩

三馬徃徃皆龍駒精神宵與凡馬俱忽不見者其前驅
定應飛上天之衢君得其二已有餘我欲與君分此圖
駑才患多不患無四十萬足將何如龍眠已徃不可呼
愈少愈貴宜寶儲

赤城詩集

句

祇教人種菜莫誤客看花

題園扉

後村詩話

郭綽

綽嵎縣人淳熙十四年進士

枕流軒

在安吉州嚴真觀

招提避雨寄孤眠夜靜溪聲到枕邊引得五湖清入燕

拍天波浪一漁船

西吳里語

王溉

溉官太府少卿兼知臨安府除權兵部侍郎

淳熙丙午遊大滌山

山合羣峯路屈盤溪行九折勢蜿蜒雲根長伴仙人迹
元蓋潛通大滌天玉殿香銷人寂寂石壇花落草芊芊

黃冠解識尋幽興為洗寒鐺煮碧泉

洞霄詩集

徐僑

僑字崇甫號毅齋婺州義烏人淳熙十四年進士理宗朝仕至工部侍郎寶謨閣待制奉祠卒諡文清有集

毅齋即事

自吾齋外付諸兒除卻詩書總不知苔色上侵閑坐處鳥聲來和獨吟時十分秋色重陽近一味新涼老者宜

調得身心能自慊止吾所止復何疑

濂洛風雅

陳峴

峴字壽南温州平陽人淳熙十四年中博學宏辭科賜進士出身官中書舍人直學士院

依綠亭

脩林平治久荒埃招領春風一笑回淨掃莓苔分徑岸

賸添桃李結亭臺

粵西詩載

林宗放

宗放字問禮宣城人淳熙丁未進士通判廣州

乞祠歸

陪郡守游西園

倒影扶闌印碧溪
玻瓈盤上玉東西
落紅那得愁如海
舉白難逃醉似泥
郎宿高明香霧起
客星華耀燭花低
波心夜半魚龍舞
都轉天風入鼓鼙

宛雅

鄭克已

克已字仁叔青田人淳熙中進士仕至福建提

刑司幹官

水國

水國烟霞客春來始定居老逢人事嬾貧覺舊交疎隙
影窺蟾滴芸香散篋書西湖風月好不到一年餘

送中書王舍人使北

細馬縷金鞍文星使可汗袖中天詔重帳外節旄寒烽
火燕城急塵沙朔野寬安邊存大體何必斬樓蘭

浙江十六夜對月

急漿寒天闊長江得月遲最憐新缺後全勝未圓時夜
雪潮千丈秋風挂一枝潛蛟易翻動怨笛莫驚吹

青衫

青衫著破禁中羅楚澤吳江幾度過仕宦宛如杯水淡
朝廷空有故人多漁村疎竹明風旆烟浦斜陽起暮歌
欲買田園歸海上此身無奈客愁何

以上前賢小集拾遺

旅中遇故人

雲薄清溪水天寒黃葉風鄉關三載別客路一尊同舊

事如昨日問年俱老翁相看今夕意淚冷菊花叢

詩家
鼎鑪

繆瑜

瑜字珍叟龍南人淳熙進士官進賢令有崆峒

詩集

遇災感應詩

并序

辛酉歲錢唐火灾延燒居民以七萬計惟吳山上一
老翁家獨全翁平時誦經樂施火起之夕以老憊不
能去遣兒與婦令亟走竟不忍相捨離處烈焰之中

全家昏然熟寐至于蒲萄架亦不焚灼夫善積于平日之閒而孝感于一念之頃其為神物護持如此行道之人相與言者必曰蒲萄架因詩之以為世人好善者之勸云

鬱攸屬者潛煽灾蜚廉縱風相與偕林林生齒七萬戶連蔓接棟燒成灰如何老翁一區宅閒不以寸獨不煖玉石俱焚勢應爾豈有幻術能然哉聞之翁乃好善者平時事佛經卷開有餘必以濟貧乏不以利欲縈其懷

倉卒遂蒙鬼神護萬目注視咸驚猜厥初巨燄熱天起
左顧右盼如燔柴翁知無地可脫免委身甘作燼與煨
魔兒與婦令亟走誓死不去無違乖全家酣寢越信宿
如聞大浪聲喧阗及其夢覺火亦息依然一室當崔嵬
微如蒲萄不熏灼而况梁棟與桷椽蒼蒼表善有如此
餘自作孽何足哀作詩誌往勸來者勿以斯語同優俳

咸淳臨安志

句

有客去遊丞相閣無人來問孝廉船

調官

後村詩話云予初筮仕江西有老選人繆瑜來訪有句一聯云云

李壁

壁字季章燾子用父任入官後登進士第寧宗朝累遷權禮部尚書直學士院同知樞密院事歷資政殿學士致仕卒諡文懿有雁湖集

使北作

天連海岱壓中州煖翠浮嵐夜不收如此山河落人手

西風殘照嬾回頭

四朝聞見錄開禧初韓平原欲興兵遣張嗣古
覘敵張還大拂韓旨復遣李壁壁還與張異辭
階是進政府壁使北有詩云云

玉堂留題

雲影沈沈玉一方倚闌人意似濠梁
獨憐雪裏山茶樹也向春風伴海棠

咸淳臨安志

酬曾景建

新有千絲明曉鏡舊無一畫贊宵衣
閑吟此外唯須飲

老覺人間萬事非

後村詩話

青雲亭

平林野水帶孤城
倦客登臨太瘦生
過眼千花競紅紫

可憐霜鬢轉分明

撫州府志

句

一杯漫道愁能遣
幾度醒來錯喚君

悼亡

憂時鐵石孤忠

在閱世風花老眼空

送楊子直知吉州

後村詩話

董居誼

居誼字仁夫臨川人淳熙進士歷官四川制置使奉祠歸有集

戚姑山

重上危樓意豁然倚闌檢點舊山川身離城郭塵囂裏
眼到雲天杳靄邊祇恐老松添歲月長教脩竹障風烟
回思燈火書窗下樓指如今六十年

撫州府志

戚璲

璲字溫如豐城人領淳熙中鄉薦以平山寇功

授奉節郎創書院于盛家洲朱文公嘗過訪贈
以詩

朱元晦過訪

蒼松翠竹映斜暉野菊花開過客稀
葉底黃蟲作寒繭
雨餘蝴蝶滿園飛

梅花樹下三間屋挂壁枯桐盡日閑
有客過門彈一曲

斷雲殘雪滿空山

皇華紀聞

李泳

泳字子永號蘭澤廬陵人淳熙中嘗為溧水令
又為阮冶司幹官與兄洪子大漳子清弟浙子
秀詮子召著李氏華萼集

題甘將軍廟卷雪樓

卷雪樓前萬里江亂峯卓立森旗槍上有甘公古祠宇
節制洪流掌風雨甘公一去踰千年至今忠氣猶凜然
我來再拜攬塵跡斜陽白鳥橫蒼烟

夷堅志大江富池縣有甘寧將軍廟殿宇雄偉
行舟過之者必具牲醴祇謁李子永嘗自西下

舟次散花洲有神鴉飛立檣竿即遇便風晡時
抵岸青蛇箭激而來至舟尾不見是夕橫泊明
日賽神其前大樓七間尤偉壯郡守周少隱采
東坡詞語扁為卷雪子永作詩云云初題梁間
本云英威凜然如有人掣其肘乃改為忠氣

王 亘

亘字伯通福州人淳熙閒知南恩州

十洲圖

山川如幻閣長秋一島飛來伴九洲不礙漁樵雙槳過
何妨羅綺四時遊雲疑秦華分張去水憶蓬瀛散漫浮

禁苑未知湖海樂生綃寫取獻中州

延祐四明志

次胡澹菴題挹翠軒韻

西山排闥來周遭自環翠俗眼少見之一覽忘世味平生三徑心盍早賦歸計縱落塵土居不與草木敵公餘事幽尋清風拂衣袂最喜軒中人所挹多爽氣蓬蒿天地寬萬境發詩思白雲未能閑時出過窗几簷花聽夜雨池草生春媚山靈若相知好風為裂袂餘光雖力挽回次那得致

肇慶府志

韓彥古

彥古字子師延安人
蘄王世忠之子
淳熙中知平江府
終敷文閣待制
戶部尚書

大智院明月巢

在富陽縣

清風去無塵
白雲來無心
一笑玉溪上
落花流水深
杭州府志

黃敏德

敏德號存菴
淳熙中句容令

入洞霄九鎖路閒

綠蘿垂地白日暗落葉滿徑行人稀
青童走入報迎客
驚罷先生一局碁

舞翠亭觀泉

坐來毛骨覺蕭然
百尺飛沉下碧天
杯酒未終身世換
盡移三峽到尊前

以上洞霄詩集

程九萬

九萬字鵬飛池州人
淳熙閒知武康縣有賢名

慶元中守歷陽有集

重建東堂

前令毛滂建

宦遊偶落雲水鄉恥以貪墨為吏商三年寄傲南窗月
一辦為炷東堂香翛然清風揖佳客好古博雅真揚揚
舊題前被古寺壁濁酒呼索鄰家牆淋漓醉墨鸞鳳舞
警語峭厲淩水霜大碑小碣共檢校次第安置堂中央
竭來弦歌有餘暇逸興騰欲希韓湘

證道寺追和毛澤民韻

二載塵勞薄宦身
雙峯幾憶舊家隣
甫能再上陽城考
更有一年孤負春

以上武康縣志

葛鄂

鄂立方長子淳熙中以朝奉郎判鎮江

留友人

良友久閒闊春事遽如許
勞君下鷗沙一葉繫春渚
昨夢墮前山再見欣欲舞
聊呼花底杯酒面點紅雨
狂歌謝貫珠清論雜揮塵
驪駒未可歌妙句須君吐

韻語陽秋

杜旗

旗字伯高金華人嘗登呂成公之門淳熙開禧
閒兩以制科薦有橋齋集

白頭吟

長安春風萬楊柳新人妖妍舊人醜貧賤相從富貴移
舊時犢鼻今存否長門作賦價千金不知家有白頭吟

金華雜識

句

君勿笑新亭相對泣卻勝蘭亭暮春集

題蘭亭序
村詩話

後

劉孝題

孝題字正夫乾淳閒以門蔭仕累官直祕閣提
舉兩浙常平除直徽猷閣

題佘山宣妙寺

水定浮春岫鴉盤落遠林上方鐘送夕隱几興何深

松江

府志

吳億

億字大年靳春人仕至靜江倅有溪園集

磨崖中興頌

借問江頭人釣魚為言靈武事何如磨崖豈是當時意

兩字噫嘻金鏡書

浯溪集

錢聞詩

聞詩字子言成都人淳熙中知南康軍有廬山

雜著

題米元暉瀟湘圖

太湖水入雪溪寒疊嶂連山幾萬般此景古今無盡藏

總歸嬾拙一毫端

郝氏書畫題跋記

錢聞禮

聞禮嘉興人第進士

簡寂觀

先生舊隱在廬山幽谷千年竹萬竿偃松拂盡煎茶石

苦筍撐開禮斗壇

方輿勝覽

章甫

甫字冠之鄱陽人居真州有易足居士自鳴集

貴耳集冠之多從于湖交游飄蕩不受拘羈淳熙間淮有三士舒之張用晦和之張進卿真之章甫冠之也

寄荆南故人

餘生自拚一虛舟未害尋詩慰客愁
梅欲飄零猶醞藉柳纔依約已風流
關心弟妹無黃犬入夢江湖有白鷗
別後故人相念否東風應憶仲宣樓

貴耳集

湖上吟

誰家短笛吹楊柳何處扁舟唱采菱湖水欲平風作惡
秋雲太薄雨無憑近人白鷺麾方去隔岸青山喚不應
好景滿前難著語夜歸茅屋望疎燈

前賢小集拾遺

林升

升淳熙時士人

題臨安邸

山外青山樓外樓西湖歌舞幾時休暖風熏得遊人醉

直把杭州作汴州

西湖志餘

俞國寶

國寶臨川人淳熙太學生有醒菴遺珠集

武林舊事淳熙間德壽三殿遊幸湖山一日御舟經斷橋旁有小酒肆頗雅潔中飾素屏書風入松一詞于上光堯駐目稱賞久之宣問何人所作乃太學生俞國寶醉筆也其詞云一春長費賞花錢日日醉湖邊玉驄慣識西湖路驕嘶過沽酒樓前紅杏香中歌舞綠楊影裏鞦韆東風十里麗人天花壓鬢雲偏畫船載取春歸去餘情在湖水湖烟明日再攜殘酒來尋陌上花鈿上笑曰此調甚好但末句未免懦弱因為改定云明日重扶殘醉則迥不同矣即日命解褐

山茶

花近東溪居士家好攜樽酒款攜茶玉皇收拾還天上
便恐筠陽無此花

全芳備祖

許尚

尚華亭人號和光老人生淳熙間有華亭百詠

華亭百詠

存十首

陸機茸

在谷水東吳陸遜生二孫常于此避獵
今名桑陸又名吳王獵場

二陸為童日馳驅屢忘歸至今桑柘響禽鳥尚驚飛

三女岡

三殮知無有香魂計已銷頻來吟楚些歲久若為招

征北將軍墓

即陸禕墓在崑山有碑村人疲于官吏征索遂碎其碑

崎嶇尋古隧衰草隱寒原欲讀將軍事豐碑祇半存

顧亭林

旦暮潮流急東西徑路斜無從質疑字共屬野王家

白龍洞

在橫雲山頂下通澱山湖每風雨夜有龍出入洞中

呼吸湖中水山椒寄此身洞門風雨夜電火逐霜鱗

俞塘

府東五里往來之舟皆可揚帆諺云雖有珠千斛不賣俞塘北

延袤三鄉外東流與海通河神屢加惠帆借往來風

普照寺

晉陸機捨宅為寺

高門收畫戟即此見精藍施子恩雖在縑流絕不談

陸瑁養魚池

即西湖也今為放生池

誰得陶朱術修治一水寬皇恩決魚鼈不復敢垂竿

唳鶴灘

湖之東南隅

養鶴人何在湖邊水尚清喚回中夜夢灘上戛然聲

湖光亭

風月堂之西

日暮蝦鬚卷亭中雅燕開微風起蘋末波影動尊罍
上以

華亭百詠

陳善

善字敬甫號秋塘淳熙閒豪士有雪蓬夜話

句

不知筋力衰多少但覺新來嬾上樓

吹劍錄

春風一日歸深院巫峽千山鎖暮雲

書貴家扇

聞說平生輔

漢卿武夷山下啜殘羹

送輔漢卿過考亭集

以上貴耳

童敏德

敏德臨川人生乾淳閒不仕

湖州題顏魯公祠堂

挂帆一縱疾于鳥長興夜發吳興曉杖藜上訪魯公祠
一見目明心皦皦未說邦人懷使君且為前古惜忠臣
德宗更用盧杞相出當斯位誠艱辛生逆龍鱗死虎口
要與乃兄同不朽狂童希烈何足罪姦邪嫉忠假渠手
乃知成仁或殺身保身不必皆哲人此公安得世復有

洗空凡馬湏騏驎

容齋三筆云語意超拔

許玠

玠字介之襄邑人有東溪詩豪

曰瑤按劉後村云端平以來與

江西曾無疑金華杜叔高九華葉子真同聘名之士有衡陽許介之蓋介之南渡寓家衡陽晚年始被召也

染絲上春機

錦江之水來蜀西女紅染絲上春機可憐欲織未織時

思君意緒如亂絲
亂絲尚可理
妾愁渺無際
寒窗軋軋
千萬梭斷魂
隨梭暗來去
蕩子醉花月
妾辜鸞鏡妝
寒蠶只解趣機杼
爭卻情如刀
劒傷織成回紋
詩寄與白
玉郎願郎勿棄
置上有雙鴛鴦
覩看雙鴛鴦
忍教孤妾

守空房

梅堯詩話

漢宮春夜

虛輪絢采千門外
窗眼滲光金箔碎
渴烏滴水續銅壺
簷馬呼風搖玉佩
宮車聲斷翠箔幽
珠簾閑卻珊瑚鉤

眉山兩點亦何有中鎖萬斛相思愁蜀羅蜜炬光明滅
紅淚難澣守宮血遙夜春寒聽曉鐘角聲滿地梨花雪
詩家鼎鑪

趙希弁讀書附志云周益公嘗親寫許介之漢宮春夜朱陵洞詞古離別出塞曲四篇而跋之

吳 琚

琚字居父號雲壑汴人憲聖太后之姪太寧郡王益之子歷尚書郎部使者直學士慶元閒以鎮安節度使留守建康遷少保卒諡忠惠有雲

經集

佩楚軒客談吳琚節使蓄雷琴號九霄環佩
書史會要吳居父太寧郡王益之子世稱吳七
郡王性寡嗜好日臨古帖以自娛字畫類米芾
以詞翰被遇孝宗大字極工

續光宗詠安榴

細疊輕綃色倍醲晚霞猶在綠陰中

光宗

春歸百卉今無

幾獨立清微殿閣風

琚

四朝聞見錄孝宗崇憲聖母弟恩故稱琚兄弟
曰哥光宗體孝宗之意故稱琚兄弟曰舅琚尤
被聖眷後苑安榴盛開光皇以黃團扇自題聖
作二句命琚足成上稱歎久之

劉光祖

光祖字德修號後溪簡州陽安人登進士第寧
宗朝遷起居郎右文殿修撰終顯謨閣直學士
提舉嵩山崇福宮諡文節有鶴林集

鶴林寺

竹院逢僧話山門掃地迎英雄猶有迹般若太無情玉
樹春陰密琅玕晚暑清半年來徃屢只合送行旌

鶴林寺志

龔準

準知江陰軍

題天慶觀碧玉堂

張安國書扁

清曉叩元關憂時鬢已斑何如閒道士隔竹看君山

咸淳

毘陵志

任璉

璉字國器黃巖人淳熙中上舍釋褐授校書郎

山居歲暮

讀罷義文先後天蕭然一室裊寒烟山中歲月那知得

但見梅花又一年

黃巖英氣

何坦

坦東陽人淳熙閒官沿海制置司幹辦公事

乞蜂兒榷于郭德誼二首

味甘宣郡蜂雛蜜韻勝雍城駱乳酥一點生春流齒頰
十年飛夢繞江湖

銀甲彈開香粉墜金盤堆起乳花圓乞君東閣長生供
壽我北堂難老仙

乞釀于郭伯瞻

洗醖試邀從事釀臥壘忽報步兵廚良辰不與清樽共
今夜儻羞明日無未論一缸分雪乳已拚千日醉雲腴
宜黃漫尉今狂甚聽我酣歌入五湖

以上石洞遺芳集

吳有定

九鯉湖

昔聞九仙靈今登九仙地裊裊一爐香寥寥千載事

九鯉湖志

葉時

時字秀發仁和人晚居嘉興淳熙中進士官終
龍圖閣學士有竹垞詩集

還桑澤卿蘭亭考

書法光芒晉永和後來摹寫不勝多考論又得桑夫子
蘭渚風流轉不磨

攜李詩繫

傅子平

子平淳熙中鳳州守

絕句

珍珠不見小槽紅
遐想柔荑剝嫩蔥
唯有萬條羅帶綠
年年依舊舞春風

鳳縣志鳳之為州當秦蜀之衝以手柳酒三絕
名世鳳塵一起號為邊鄙者四十餘年淳熙初
鳳州守傅子平詩云云



宋詩紀事卷五十六